


In plaid da cumiau per:

GR 7 - 10 - 83

# Rosa Jacomet-Derungs, Sedrun



1910 ha la veta da Rosa Jacomet-Derungs priu si'entschatta cheu sin tiara. 1983 ha ella terminau sia veta terrestra. Varga siat decennis ha sia veta cuzzau. Co duei ins era pomai descriver il curriu e passau enteifer quei temps?

Ils datums dalla veta ein spert detgs: Naschida ei Rosa ils 12 da mars 1910 a Sedrun sco emprem affon ord la lètg da Gion Mihel Derungs ed Onna Maria, nata Jacomet. Gia cun siat onns daventa ella mesaorfnha, aschia ch'ella vegn educada dalla mumma e digl aug Gion Giusep. Ils 30 d'october 1930 sespresa ella cun Aluis Jacomet. Ord quella lètg ein treis feglias e quater fegls sorti. Il mariu e bab Aluis Jacomet ei morts da Nadal 1955. E Rosa Jacomet-Derungs ei suandada il matriu ils 19 da settember 1983.

Mo ei quei tut - semplamein enumera muments, ch'ins sa controllar el calender? Mai! Quei che sezuppa davos quels siat decennis, gliez ei *gl'es-senzial dil carstgaun*, gliez quenta - surtut avon Diu.

## La rosa ha in bellezia ornament

Sco agid per nossa memoria s'imaginein nus la flur «rosa» avon nies egl. - Dapi il batten ha la defuncta purtau quei num. E quel ei daventaus significativs e simbolics per la veta da quella donna e mumma. - Nus vesein: quella flur porta *in bellezia ornament*. Aschia ha era Rosa Jacomet-Derungs, mia mumma spirituala, purtau in bellezia ornament enten ella. E quei ornament secloma: Ina cardientscha nuballucconta enten in bien Diu; ina speronza maisudida, che tut prendi en num da Diu ina

buna fin; ed ina carezia pils ses entochen il davos di da sia veta. Quei ornamant ha ella retschiert - sco in brumbel - entras il sogn sacrament dil batten e dalla creisma - ed el decuors dalla veta ha ella sviluppau quei brumbel e quel ei daventaus ina flur. Sco cartents lein nus sperar, che Dieus retscheivi en sia buontad quella flur cul num Rosa.

## La rosa ha spinas

Nus tuts enconuschein denton il plaid: Neginas rosas senza *spinias*. Quei ei ella natira aschia, ed ei era buca auter ella veta. E Rosa Jacomet-Derungs ha sentiu quellas spinas ella veta, pir che mai: Ina furada ha ei dau, cu siu mariu Aluis Jacomet ei morts da Nadal 1955. Restar anavos da gliez temps cun siat affons, quei ei in grev buordi. Ina secunda furada ha ei dau, cu siu fegl Mihel ei morts ils 6 da settember 1970 e schau anavos dunna ed affons pigns. Gl'ei buca avunda. In'ulteriura furada ha ei dau, cu ins ha mess en bara sia feglia Rosa ils 3 da zercladur 1977. Ed era la mort dil schiender Sigis ils 24 d'october 1972 ha furau il cor; ha el gie schau anavos dunna cun treis affons, che havessen giu aschi da basegns digl agid e la tgira dil bab. E sco ei dat en mintga famiglia, aschia ha la defuncta sentiu el decuors dalla veta las spinas, ch'ins numna «far quitau pils ses».

## Damondas - rispostas

Nus havein avon nus la rosa cugl ornamant e cullas spinas. Omisdus muments audan ensemen. Aschia vesein nus era la veta da Rosa Jacomet-Derungs. E cheu setschentan a nus *damondas*: Ei quella cardientscha, quella speronza e quella carezia stadas tut per nuot? Ei quei haver giu quitaus e pitir stai tut per nuot? - Ina *risposta* sin da quellas damondas dat a nus sogn Paul ella brev als cristifidevels da Corint (1 Cor 15,13 e 20): «Sch'ei dat negina levada dils morts, sch'ei era Cristus buca vegnius leventaus. Mo sche Cristus ei buca vegnius leventaus, sch'ei nies priedi vans, e vana era vossa cardientscha. Mo Cristus ei vegnius leventaus da mort en veta, sco emprem da tut ils morts.» La *risposta* secloma cun auters plaid: Rosa Jacomet-Derungs ei morta per quest mund ed il cumiau fa adina mal. Mo ella viva en l'auter, en cumionza cun Diu e cun tutz cartents gia sparti da nus. Quei di nossa cardientscha cristiana. Quei duei era esser nostra profunda consolazion,

## Engraziel

A nus che restein anavos, descha ei da dir a Diu in sincer «engraziel fetg». El ei il donatur da tut ed ha era schenghegiau a nus per varga siat decennis Rosa Jacomet-Derungs. Ei descha a nus da dir ad ella sur fossa in cordial «Dieus paghi per tut», per siu exempl el viver e murir. En num da mia mumma spirituala engraziel allas feglias Maria Luisia e Marianna per l'excellenta tgira da lur mumma, ual ils davos onns, nua ch'ella era rentada vid la sutga da rodas e vid il letg. Engraziel als fegls Fernando, Claudi e Cristofel. Mintgin ha sespruau da visitar e consolar lur mumma. Engraziel alla brit Enrichetta da Aquila. Ella ha cun ses affons visitau stediamein la sira e tatta a Sedrun. Engraziel - era en num dallas familias Jacomet - al schiender e quinau Sep Andriu Monn-Jacomet. Siu agid a sia sira ha el fatg cun gronda premura e cun humor. Engraziel era a dunna Augusta Cavegn-Bearth ed a tuts che han visitau l'onda Rosa, specialmein ils davos treis quater onns. Quella engrazieivillad enviers Diu ed enviers la defuncta duei esser vinavon nossa tenuta e nossa consolazion.

## Mumma spirituala

Pér oz vi jeu dir publicamein, daco che jeu hai elegiu avon 16 onns l'onda Rosa sco mumma spirituala: Ina dunna cun quei profil ual descret; ina dunna che ha pitiu ton senza daventar petra; ina dunna che ha era en mes giuvens onns sco scolar e student adina giu capientscha ed in plaid encuraschont per ins; ina da quellas dunnas hai jeu vuliu sco mumma spirituala. Ed oz astg'jeu dir: gl'ei stau ina fetg buna mumma spirituala. E miu tschupi sin fossa ei mi'oraziun ella sontga messa per ella.

## Madretscha

«Protegia cheu sin tiara nossa sort, e gida nus tier ina buna mort.» Quei text ei secrets sil zenn sogn Giusep dalla baselgia a Rueras. E 1929 ha Rosa Jacomet-Derungs fatg madretscha a quei zenn. Il cuntegn da quei text ei veramein severificaus el viver e murir dalla defuncta: Urau ha ella, che Dieus e tut ils sogns gidien e protegiess nostra sort sin tiara. Ed ina buna mort ha ella era giu. Rosa Jacomet-Derungs ei sedurmentada ruassevlamein, ual cura ch'ils ses uravan la fin dalla litania da sogn Giusep, el, il patron dils moribunds. - Il zenn sogn Giusep a Rueras aulza vinavon sia vusch - era en num da sia madretscha Rosa Jacomet-Derungs - ed ura: «Protegia cheu sin tiara (era) nossa sort, e gida (era) nus tier ina buna mort.»

Pader Silvio Deragisch OFMCap.